



EDITOR:
Bonaire Communication Services N.V.

Djabièrnè 23 sèptèmber 2022|Preis:\$1.00


DIVI FLAMINGO ANTI SINDIKALISMO

Konsehero di komunikashon i bosero nobo pa Kuerpo Polisial



Djárason den un ambiente ameno, a introdusí Genesis Saragoza, komo e konsehero di komunikashon i bosero nobo di Kuerpo Polisial Hulanda Karibense na prensa. E ta sigui Miluska Hansen, kende a kumpli ku e funshon pa mas di 4 aña. A probechá di e oportunidat pa tuma despedida di forma ofisial di Miluska.

MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA



 CHANGAN AUTO



MD201 CARGO BOX

 /dabboussimotors

xerox™



OBERSI
ELECTRONICS
BONAIRE

Live
FM 99

Tempu riba Boneiru

No a nota masha di e mal tempu riba Boneiru ayera. Reportero di BONERIANO a sali riba kaya i a topa ku algun situashon, manera laman un tiki turbulento na kosta, banderanan ku tabata bula kontrario i algu di yobida. Ban spera den kurso di anochi tur kos keda trankil asina.



Consuelo Memorial

Kaya Maria C. Hellmund-Boom 11 • Bonaire • CN
T/F: (+599) 717 3243 (24h) • info@consuelomemorial.com •

Señor ta mi Wardador, mi no tin falta di nada; den kunuku di yerba bèrdè. E ta poné mi sosegá. E ta hibami na awa trankil, pa mi bolbe haña forsa - Salmo 23 -

Ku inmenso doló na nos kurason pero konforme ku boluntad di Dios, ta partisipá fayerimentu di

Headworld Cornelio Emerenciana

*17 oktober 1963 – † 20 september 2022
mihó konosí komo Wotty / Christobal Sandoval / Palu Wot

Na nòmber di su mayornan:

Alejandro Emerenciana i Cornelia Emerenciana-Hart

su esposa:

Shahaira Emerenciana-Caupain

su yunan:

Roxanne Emerenciana i Aldrin Sambo

Germain Emerenciana i Hermeline de la Court

Jedward Martes i Kenia Quant

su nietunan:

Rowendel de Jesus

Thalia Emerenciana

Kaynan Emerenciana

Judward i Jedrionne Martes

Rumannan:

Marelijn Lucas-Emerenciana i Rutzen Lucas

Oswaldo Emerenciana i Marjorie Noor

Henri Emerenciana i Marlynella Conception

Marvalda Emerenciana i Hubert Emerenciana

Aljano Emerenciana i famia

Subrino- i subrinanan:

Naomi Lucas, Leonard Emerenciana i rumannan, Queendyda Antonisia-Emerenciana i rumannan, Latinova Emerenciana i rumannan, Rooliandra Zimmerman-Emerenciana i rumannan

Tio- i tantanan:

Edison Hart i famia, Idelio Hart i famia, Olga Emerenciana-Hart i famia, Julian Emerenciana i famia, Bernardo Emerenciana i famia

Tur su primu- i primanan, achter(achter) primu- i primanan, su ihá-, komader- i kompadernan.

Su suá- i kuñanan

Su mihó amigu- i amiganan: Michael Pieters, Juvenal Merced, Nolly Wilsoe, Polito Dirks

Licetha Saragoza i Norwin Willem, tur ku nan respektivo pareha, yu(nan) i famia.

Tur bisiñanan, ATC Tera Cora, Biljart team Sharpshooters, La Sonrisa Softball, Ama's softball, Domino groep Ahichi Pika Pika, su trahadornan di Flamingo Party Rentals; Mavis, Nichel i Daiene, su koleganan programa di deporte VOZ di Boneiru; Erica, Jaryd, Feliciano, Ranny, Marvin, Eddy i Glenn Albertina, tur demas konosi, amigu- i amiganan.

Un danki speshal ta bai na su subrinanan Rooliandra, Chantal i Latinova

Demas famia i konosinan

Emerenciana, Hart, Caupain, Angelista, Marchena, Clarendia, Bomba, Scherptong, Feng, Huisman, Walters, Noor, Sambo, de la Court, Balooche, Zimmerman, Keller, Martes, Leoneta, Raphaela, Piloto, Kok, Amerlaan, Melaan, de Palm, Webster, Wang, Winklaar, Emerencia, Rosaria, Cicilia, Statia, Oleana, de Jesus, Cornelius, Maria, Kroon, Maduro, Shwengle, Walle i Eybrecht.

Si den nos tristesa nos por a lubidá algun miembro di famia, amigu òf konosí, nos ta pidi nos diskulpa.

Akto di entierro ta tuma lugá djadumingu 25 sèptèmber. Por tuma despedida di 10' or pa 12'or na Consuelo Memorial sigui ku un rèspons pa despues pa santana katóliko na Playa. Konforme deseo di e defuntu, ta pidi pa bini na trahe alegre.

NO por risibí bishita di kondolensia na kas ni promé ni despues di entierro.

Por sigui e entierro bibu via pagina di youtube di VOZ di Boneiru:

<https://youtube.com/user/vozdibonaire>



Awaseru ta molestia preparashon pa e prome Bonaire Festival....

Tulipan Multi Services B.V.

ta buska

2 kapper

Pa mas inf.

tel. 770-7699



PARTISIPASHON

TOPIKO

Kolegio Ehekutivo di Entidat Públiko Boneiru ta partisipá ku un dia despues di e publikashon aki, e estudio riba e Impakto Ambiental (MER beoordeling) na Contour Global, pa loke ta trata e instalashon di un planta di panela di solo, ta na disposishon di públiko.



Fecha: 23 - 9 - 2022

Orario: 9' or - 11' or (djaluna te ku djabièrnè)

Adres: Kaya Amsterdam 21 (Direktorado di Planifikashon i Desaroyo)

Durante di e periodo aki por entregá komentario por eskrito dirigi na Kolegio Ehekutivo.
E prosedura di publikashon ta reglá den e Dekreto Insular, Ao 2015 No 7, ku ta trata e prosedura pa un rapòrt di Impakto Ambiental (MER beoordeling).

Direktor di direktorado Planifikashon i Desaroyo
Ing. Marlon Martina, MBA

Fundashon Flor di Orkidia 60plus

ta partisipá fayerimentu di

Sra. Maria Semeleer

Sra. Maria ta miembro di
Fundashon Flor di Orkidia 60plus
Mama di nos miembro

Ezzard "Ezzy" Semeleer i
suegra di nos presidente Enid Semeleer.



Nos ta deseá famia Semeleer hopi forsa ku e pérdida grandi aki.

Ku Maria su alma sosegá na pas.

DIVI FLAMINGO ANTI SINDIKALISMO

KRALENDIJK – Referèndem mester bai disidí sí trahadónan di Divi Flamingo Beach Resort ta afiliá na AFBW.

Despues ku AFBW a manda karta pa e dunadó di trabou i den e kaso akí e promé reakshon di e doño di trabou tabata ku e ta anti sindikalismo.

E sindikato tabatin reunion ku abogado di e hotèl i a resultá ku no tabatin mayoria.

E ora ei a bisa e doño ku ta bai sigui wak mayoria, pero den kartanan bai bin ku nan abogado, a resultá ku komo dunadó di trabou nan no ke asepta AFBW, presidente di e sindikato, Cherel Kwidama, a deklará na BONERIANO.

Komo úniko media, for di mart BONERIANO a publiká ku trahadónan di Divi Flamingo a bandoná FEDEBON i ku tur probabilidad ta ai afiliá na AFBW,

p’esei mes tambe e kontakto ku presidente di AFBW pa tende di dje kon e desayonon ta aktualmente.

Kwidama a bisa: “E tempu ei mi no tabatin nada definitivo, pues no por a konfirmá e informe di boso.

Awor aki ta hasi dos aña ku e trahadónan no tin un sindikato ta representá nan, pasobra e stòp di retené sèn di e miembro pa pas’é pa FEDEBON.

Statuto ta bisa ku for di ora ku no ta paga bo no ta miembro mas.”

Referèndem

Despues di esei tabatin diferente reunion ku a tuma lugá, segun Kwidama, na momentu ku e trahadónan a bira miembro ofisial dor ku nan a retirá for di nan sindikato kasi dos aña kaba, e ora ei AFBW a laga nan yena formulario pa bira miembro i mayoria di e trahadónan a bira miembro.

Despues a manda karta pa e dunadó di trabou i den e kaso akí e promé reakshon di e doño di trabou tabata ku e ta anti sindikalismo.

Kwidama a sigui bisa, nos tabata reunion ku abogado di e hotèl i a resultá ku nos no tabatin mayoria. E ora ei nos a bisa e doño ku nos ta bai sigui wak mayoria, pero den kartanan bai bin ku nan abogado, a resultá ku komo dunadó di trabou nan no ke asepta nos.

Komo AFBW nos a sigui e sistema di lei i nos a drenta kontakto ku mediadó i a pidi’e pa organisá un referèndem.

E organisashon di e referèndem ta bayendo den bon direkshon i ta den su último fase. Awor akí mediadó di SZW tin ku publiká ku ta bini un referèndem pa duna un otro sindikato chèns pa sí tin mas sindikato interesá pa nan tambe tuma parti na e referèndem, anto e ora ei ta bai haña ku mediadó i SZW ta bai organisá un referèndem pa partisipashon di e miembronan pa un sindikato representá nan.

Menasa

Mester menshoná, di akuerdo ku Kwidama, ku entre tantu sigur e sindikato tin prueba di miembronan ku ta splika kon ta menasá nan i e sindikato a denunciá esakinan na mediadó, pasobra aki atrobe ta mira abuso laboral pisá ku ta tuma lugá na Boneiru i den e kaso akí un Divi Resort kaminda tin hopi mal kontentu ta reina i no ta pòrnada e trahadónan akí a alehá for di FEDEBON.

Nos tur sa kon e sindikato akí su forma di proseder tabata i p’esei tambe ta pèr-

diendo organisashonnan tur dia, pero aki ta mira ku un dunadó di trabou tambe ku no ta trata su trahadónan mihó i ta menasá nan.

E trahadónan tin hopi miedu, Kwidama a splika, pero nos ta kere ku komo AFBW nos ta kanando e kaminda legal i laga pa e trahadónan akí den un referèndem demokrátiko sí nan ke pa sindikato representá nan sí òf nò. Na momentu ku e resultado den su mayoria ta sí, AFBW lo drenta Divi i atendé ku e dunadó di trabou pa su manera di atendé

ku trahadó i nos lo sali na vanguardia di e trahadónan i mesora nos lo bai tambe pa sera un CAO, mirando ku e situashon laboral di e trahadónan ta hopi pésimo.

Kwidama: “Pues nos komo sindikato lo atendé manera nos ta atendé pa e klase trahadó, pa musta e dunadó di trabou ku mester respetá trahadó i sí e sali nò ku e trahadónan no ke pa un sindikato representá nan, e ora ei nan a skohe pa keda komo katibu i keda den loke nan mes ta pasa aden tur dia.



Federashon di Futbol Boneriano

ta partisipá fayerimentu di

sra. Maria Semeleer

mama di Sylvio 'Chio'Semeleer

Nos mas sinsero palabranan di kondolensia i hopi forza na famia Semeleer.



ENTIDAT PÚBLIKO
BONEIRU



REUNION KONSEHO INSULAR

Presidente ta partisipá ku tin un reunion públiko di Konseho Insular (toma di desishon), riba djamars **27 sèptèmber 2022, pa 19.00'or** den sala di reunion di Konseho Insular na Passangrahan. Ta trata di e reunion di 13 di sèptèmber 2022 ku a posponé.

Agènda:

1. Apertura / Partisipashon;
2. Tempu pa pregunta;
3. Oportunidat pa siudadano hiba palabra;
4. Dokumentunan ku a drenta (período 23 di mei te ku 30 di yüni 2022 i di 01 yüli te ku 15 di ougùstùs 2022)
5. Stipulashon di agènda;
6. Stipulashon di e promé ehèkushon di reportahe 2022 di Gobièrnu di Boneiru;
7. Klousura.

Ta invitá Kolegio Ehekutivo.

E konvokashon aki lo keda publiká elektrónikamente riba e parti públiko di e sistema di informashon di Konseho Insular (RIS) i te asina leu ku ta aplikabel, e dokumentunan konserní manera kustumber ta na Grefi na disposishon.

Lo transmití e reunionnan di Konseho Insular “live” atrabes di e dos kanalnan di televishon Nos Tv i Dutch Caribbean TV. Tambe por sigui e reunion riba nos página di facebook i Youtube.

E.E. Rijna
Presidente



NOS FOLKLOR

Nos vestuario di antaño ta simplemente arte ku meresé di keda salbaguardiá.



Tres kaptura pa Wardakosta i Defensa

KRALENDIJK -- Mainta tempran di djadumingu 18 di sèptèmber, Sentro di Operashon Marítimo, MOC, di Wardakosta Karibe Hulandes, a alertá e barku patruyero tokante un boto sospechoso. Despues di e notifikashon di MOC, Zr. Ms. Groningen a nabegá bai e lokalidat di e boto sospechoso pa interseptá esaki. E avion patruyero Dash di Wardakosta tambe a keda dirigí na e lokalidat pa asistí e barku patruyero.

Una bes den besindario

e barku, a lansa su dos botonan rápido di intersepsion, asina yamá FRISC. Na momentu ku e pasaheronan di e go-fast a nota e FRISC-nan, nan a purba hui i a kuminsá tira bulto ku kontrabanda den laman. Al final despues di un persiguishon kòrtiku, a detené e sospechosonan. Riba e go-fast tabatin seis sospechoso ku mas pakete ku droga.

Durante momentu di kaba di atendé e promé akshon, Zr. Ms. Groningen



un biá mas a keda notifiká di un boto sospechoso. E biá akí tambe e FRISC-nan a kuminsá ku persiguishon pa obligá e boto pa stòp. E kuater pasaheronan di e boto a keda detené i huntu ku e paketenan, ku supuestamente tabata kontené droga, a keda tresé bordo di Zr. Ms. Groningen.

Mas lat den dia, a

deskubrí un di tres go-fast ku tabata nabegá serka den besindario di e barku patruyero Groningen. Un biá mas a lansa e FRISC-nan pa sali bai investigá. A resultá ku e boto tabata un go-fast ku tres pasahero ku tabatin supuestamente bultonan di kontrabanda na bordo.

A trese un total di 13

sospechoso i mas o ménos 3700 kilo di kontrabanda, di kua mitar tabata kokaina i e otro mitar mariwana, na bordo di Zr. Ms. Groningen. Tur e sospechosonan mas e paketenan, a keda entregá na outoridatnan na Kòrsou pa sigui investigá e kasonan. Despues di investigashon, a destruí e bultonan.

Morela Felicia maestro di seremonia

KRALENDIJK – Djadumingu 25 i sèptèmber selebrashon di Dia di Boneiru ta tuma lugá na Den Haag, Hulanda.

Un biá mas e maestro di seremonia bon konosí pa

hendenan di Boneiru, ta bai dirigí tantu e parti oficial komo e parti kultural di Dia di Boneiru na Hulanda.

Ademas e maestro di seremonia ta un persona

bon konosí pa su ekspresion verbal elokvente, kende ta Morela Felicia. Felicia tin na su enkargo e tarea pa dirigí e selebrashon di Dia di Boneiru na Den Haag, Hulanda.



Simons ta reprochá pensamentu superioridat di Rutte

KRALENDIJK – Miembro di Tweede Kamer di BIJ1, Sylvana Simons, durante e konsiderashon polítiko general, a reprochá e pensamentu di superioridat di Gabinete pa ku gobernantenan di e parti Karibense di Reino.

“Kaminda e kresementu

di pobresa den nos Reino ta fuerte na e otro parti di Oséano Atlántiko, ta reina un aktitut di deskonfiansa pa ku gobièrnu di Reino i e gobièrnunan di e parti Karibense di Reino.

Ta kalifiká nan dor di pensamentu di superioridat i dor di e idea ku nos aki na

Den Haag sa mihó ku nan kon mester goberná,” segun Simons. For di e posishon ta bini un anti boluntat polítiko pa por ehèmpel desishon definitivo pa stipulá un mínimo sosial ku ta duna derecho na e kosto di bida real riba e islanan, Simons a agregá.



Despues di estudio di 12 aña mekániko ta bira dòkter

“Nunka ta lat pa hasi bo soño realidat”

KRALENDIJK – Un anterior mekániko di Cleveland despues di kasi 32 aña di apertura di su garashi, a alkansá su meta pa bira dòkter. Carl Allamby di 51 aña, na 2010 a pone a promé stap den direkshon pa realisá su soño pa medio di un estudio den e mundu médiko.

Kaminda largu

Carl a kuminsá su promé funshon real komo dòkter na Hillcrest Hospital di Cleveland Clinic, na Mayfield Heights, Ohio. Ei nan e mester a kana un kaminda largu. El a bai bèk tempu ku e tabata mucha di e ambishon pa bira dòkter despues ku na 2006 el a inskribí su mes pa un estudio pa logra un diploma em-

presarial. Despues di kasi 20 aña komo empresario, el a skohe na 2010 pa kam-bia di rumbo i inskribí su mes pa un estudio médiko na Cleveland. “Despues di mi desishon pa bai studia medisina, mi a kuminsá ta hasi trabou boluntario den un hospital den besindario di Cleveland,” Carl a konta FOX News. Hopi lihé e tabata sa ku el a hasi un bon eskoho. “Kada riesgo ku komo dòkter mi tabatin, ta konfirmá mi eskoho pa enfatisá pa un karera mé-diko.”

No stòp abrupto

Durante su periodo di estudio na Cleveland State University pa realisá su soño, Carl a keda hasi su trabou di drechamentu di



outo pa sigui generá entrada. “Sinku aña largu durante wikènt, anochi i mainta tempran, mi a sigui lès, miéntas mi tabata manehá mi empresa i estilo di bida pa hasi karera,” el a bisa.

Pa Carl no tabata opshon pa stòp direktamente ku su trabou komo mekániko.



“Mi no por a stòp direkta-mente ku mi trabou den e negoshi di outo. Mi tabatin hopi hende ku tabata konta riba mi i hopi mantenshon.”

Mas bieu ku e otronan

Na 2015 Carl a finalisá su estudio inisial i a kuminsá mesun aña na Medical University na Ohio. “E tempu ei mi tabatin 45 aña, pero tabata kombensí ku mi lo no a stòp pa motibu di mi edat. Ounke ku tabatin hopi estudiante yòn.” Carl ta konta ku e no tabatin tempu pa desvia. “Mi a traha duru pa hasié eksitoso. Pero mi ta pensa prinsipalmente ku tur mi responsabilidatnan netamente a mantené mi di fofùs riba loke ku mi mester a hasi.”

Hasi soño realidat

E anterior mekániko a terminá su estudio ku 47 aña i a kuminsá seguidamente na e trayekto di dòkter di kasonan di urgensia na Cleveland Clinic Akron. Carl ta mira su tempu komo empresario den e negoshi di outo komo un faktor esensial na kaminda pa su éksito pa bira dòkter. E eksperensia di su funshon anterior, Carl ta hiba kuné na su trabou nobo. “Mi tabatin hopi kliente ku visiblemente a spanta momentu ku mi a splika nan di mi intenshon. Interesante ta ku birando bieu, e konekshon humano, empatia i kuido pa otro, a bira ainda mas importante pa mi. Mi ta hopi kontentu ku despues di 32 aña di apertura di mi garashi, mi soño di mucha pa bira dòkter, a bira realidat.”



Segun hopi krítika:

Pashèntnan no ta haña remedi apesar ku a entregá resèpt

KRALENDIJK- Den e último lunanan tin un oumento di keho di pashèntnan ku no ta risibí nan remedi na botika. Botika ta splika e pashènt ku ta su dòkter di kas no a manda e resèpt miéntas e dòkter di kas ta insistí ku esaki no ta e kaso. “Ta algu basta inkómodo pa nos ku sí ta manda resèpt i p’e pashènt ku ta pèrdè su tempu”, dòkter Castro ta bisa. E ta dòkter di kas na e ofisina di dòkter Castro de Castro na Rincon

Proseso

Fundashon Mariadal (FM) tin un proseso kon pa entregá resèpt. Segun FM, e botikanan a manda e instrukshon pa tur dòkter di kas tokante kon manda un resèpt. “Si e resèpt wòrdu manda segun e instrukshon ta indiká, e proseso lo tin ku kana bon”, Javier Semeler ta bisa. E ta bosero di Fundashon Mariadal. Por ehèmpel si manda un resèpt parti mainta, ta despues di 3or di mèrdia por buska e remedi. Pero si e pashènt no ta na altura di esaki, por kousa ku e pashènt ta bini

pòrnada parti mainta. Lògikamente esaki por kousa frustrashon serka e pashènt.

Segun Semeler por tin otro motibu tambe ku no ta risibí un resèpt korekta-mente. “Posiblemente un resèpt a bai por ehèmpel botika A pero e kliente a presentá na botika B. Esaki tambe ta algu ku por pasa. Asina por tin mas motibu”, e ta splika.

Mihó servisio

Semeler ta enfatisá ku Fundashon Mariadal ta habrí pa krítika konstruktivo

pa asina por ofresé mihó servisio na komunidad Boneriano. “P’esei mi a komuniká ku nos botikarionan di FM pa nan ripití e instrukshon nan aki na tur dòkter di kas

i ripití esaki ku mas frekuen-sia. Nos meta ta semper pa e kliente ta na promé lugá i asina evitá molèster durante e proseso di tuma remedi”, segun Semeler.



No a aktua kontra Chogogo Beach Resort

STINAPA ta kulpa gobièrnu

KRALENDIJK – STINAPA ta kulpa gobièrnu lokal formalmente, pasobra no a aktua kontra Chogogo Beach Resort. Esaki Trouw a informá djaweps den un artíkulo bou di e kabes ‘Gobièrnu ta laga naturalesa stek’, den kua direktor di STINAPA, Jan den der Ploeg, ta bini ekstensamente na palabra. Un di e kehonan di e organisashon di naturalesa ta ku Entidat Públiko Boneiru anteriormente no a eksigí e multa di 1,2 mion dòler imponé.

E resort aña pasá a haña e multa pasobra a hisa e bich ku santu di riu importá sin e pèrmitnan nesasario. Aparte di esei, e muraya di protekshon ku mester evitá ku e santu ta spula bai laman, no a kumpli ku e kondishonnan.

A tolerá e situashon bou di kondishon ku lo mehorá e muraya di protekshon.

Segun van den Ploeg, esaki no a sosodé. Na aprel a pidi gobièrnu lokal pa aktua. E direktor di STINAPA ta papia di un menasa grandi di koral i ta preokupá tokante e plannan pa mas bich artifisial.

Pidí pa un splikashon, van der Ploeg ta bisa: “Chogogo Resort no ta tene su mes na e kondishonnan

di e pèrmit. No a adaptá e muraya di protekshon, e santu mester keda 20 centimeter bou di e muraya.

Dia 19 di aprel STINAPA a pidi Direktorado di Supervishon i Mantenshon di Lei, pa aktua. Pasobra no a reashoná, dia 11 di yùli STINAPA a hasi opheshon. Awor un biá mas 10 siman a pasa. Ayera un biá mas

nos a pidi Direktorado di Supervishon i Mantenshon di Lei pa aktua, un asina yamá atvertensia di fayó.”

STINAPA ta haña ku tur hende mester mantené nan mes na e regulashon di naturalesa insular i mester respetá desishon di gobièrnu, sigur un multi misionario grandi manera TUI.

No por ta asina ku em-

presarionan hulandes ta para riba lei, no mester paga but i nenga kondishonnan den e pèrmit, segun van der Ploeg. Entre tantu tin kombersashon ta tumando lugá entre Kolegio Ehekutivo, Direktorado di Supervishon i Mantenshon di Lei i STINAPA, pa konhuntamente yega na un solushon.



ASTA DEN E SKURIDAT

“Ken entre boso ta teme SEÑOR, ken ta obedesé e bos di Su Sirbidó, ken ta kana den skuridat i no tin lus? Lagu’é konfia den e nòmber di SEÑOR i dependé riba su Dios.” Isaías 50:10(BS)

Dia tras dia nos mundu ta birando mas i mas skur; malesanan straño, guerra, kiebro familiar, rebeldia di yunan, inkietut den área laboral, gobernashon instabil, etc. Na komienso di kreashon Dios a bisa ku tabatin skuridat riba superfisie di e abismo (Genesis 1:2) i for di e skuridat akí Dios a krea tur e kosnan bon. Skuridat por bira lus!

Tin biaha Dios ta pone nos den situashonnan skur; malesa, pèrdè trabou, morto den famia, etc. pa asina E por forma nos na e persona ku E ke pa nos ta. Durante e periodo di skuridat E ta siña nos, oumentá nos fe i konfiansa, hiba nos na e punto di dependensia total ariba djÉ so. Ta momentonan ku E ta tuma pa prepará nos pa tareanan muchu mas grandi i maravioso ku E tin wardá pa nos, ma nos no ta kla pa nan ainda. Esei E ta hasi den amor, ku pasenshi i na Su tempu perfekto, ku tin biaha nos no ta komprendé.

Kòrda kuantu Hesus a sufri pa nos motibu i kon El a laga un ehèmpel atras, p’esei nos tambe mester ta dispuesto pa sufri p’É pa asina un dia nos por tin partí den Su gloria; ku e propósito korekto ku El a yama nos p’É. (1 Pedro 2:21)

Abo lesadó, bo ta pasando den tempunan di skuridat kaminando bo ta puntra bo mes dikun òf kiko ta pasando? No pèrdè ánimo ni fe, ma sigui perseverá pasobra Dios ta lus i E lo lusa e skuridat pa tur esnan ku tem’É i obedes’É.

Si Dios ta presente, asta e skuridat ta bira lus; konfia i dependé ariba SEÑOR!

Gilda Beukenboom-Sintjago
Produkshon PGM

**Pa info i komunikado den Extra/BONERIANO,
USA MAIL:**

extrabon@gmail.com



Programanan di Bonaire.tv

TELBO kanal 70

Flamingo TV kanal 23

Djabièrnè 23 sèptèmber 2022

12.00 Herensia Korsou:	Benjamin Sixto Martinus
13.00 Aki Boneiru:	Rose Mary Allen
14.00 Herensia St Eustatius:	Sylvia Angela Rivers
15.00 BAPA:	Elaiza Noris Pietersz
16.00 Aktualidat:	Robby Schouten
17.00 Aki Boneiru:	Angele Cecilia-DS Dansschool
18.00 Herensia:	Theresa Harms & Juliana Snijder
19.00 BAPA:	Cherel Kwidama
20.00 Herensia:	Nort'i Saliña 9 (Kas pa kas)
21.00 Aki Boneiru:	Nicky Pietersz
22.00 Herensia:	Dr. Livio Hermans
23.00 BAPA:	Monchin Flanders

**Tur mèrdia 12’or ta kuminsá un programashon nobo di 4 ora.
E programashon aki ta ripití pa 24:00.**

MI REKUERDONAN DEN POTRÈT



Pa: Bòi Antoin



MONCHI & TONCHI

Tonchi, awor ta outo eléktriko nan ke pa nos kore.

Awèl sí, di baina nos tin sèn pa paga koriente i awor nan ke pa nos karga nos auto tambe, kon ta hasi?



KOLOFÓN
Editor Bonaire
Communication
Services N.V.
Kaya Irlanda 12,
Tel. 717-8482
E-mail:
extrabon@gmail.com
Wèpsait:
www.extraboneiru.com

Direktor
Shirley Martis
785-3824
796-3824

Hefe di redakshon
Bòi Antoin
786-6818

Redakshon
Armand 'Papi' Antoin
Davienuska Janga
Velli Gijsbertha
Nathaly Evertsz
Edson Pietersz

Ibi Piar (deporte)

Partner na Aruba
Awe Mainta

Partner na Kòrsou
Extra

Layout
Davienuska Janga
Gairo Frans

Aviso
avisobon@gmail.com

Ser humano ta straño

E ta bringa ku esnan bibu i ta hiba flor na esnan morto

E ta kore ku esnan bibu for di kas i ta pidi un “bon lugá pa esnan morto”

E ta alehá su mes di esnan bibu i ta biba desesperá ora esakinan muri.

E ta pasa tempu sin papia ku un hende bibu i ta diskulpa su mes hasiendo homenahe ora esaki muri

E no tin tempu pa bishitá un hende bibu pero tin henter un dia pa ta na entiero di esun morto

Krísis

“No laga nos pretendé ku kosnan ta kambia, si semper nos ta hasi mesun kos.

Krísis, ta e mihó bendishon ku por sosodé ku personanan i paisnan, pasobra krísis ta trese progresonan. Kreatividad ta nase di angustia manera dia ta nase di anochi skur.

Den krísis ta nase lo inventivo, deskubrimientunan i strategianan grandi. Esun ku ta superá krísis ta superá su mes si keda superá.


Esun ku ta atribuí su frakasonan i eskases na krísis, ta violá su propio talento i ta respetá problemanan mas ku solushonnan.

E berdadero krísis, ta e krísis di inkompetensia.

E inkonveniente di personanan i paisnan ta e flohera pa haña salidanán i solushonnan. Sin krísis no tin desafío, sin desafío bida ta un rutina, un agonia lento. Sin krísis no tin mérito.

Ta den krísis lo mihó di kada un ta bini ariba, pasobra sin krísis tur bientu ta karisia. Papia di krísis ta promov’é, i keda ketu den krísis ta eksaltá konformismo. Na lugá di esaki, laga nos traha duru. Laga nos kaba di unabes ku e úniko krísis menasante ku ta e tragedia di no ke lucha pa super’é.”

(Albert Einstein)



kontinuashon pag. 12

ta abarká gobièrnu, polítika, famia i lo militar.

Pikánan kontra prudensia: No buska Dios komo balor supremo.

Imprudensia ku ta dividí den tres:

E rapides ku kua ta aktua sin konsiderashon i masha purá, guia dor di pashon o kapricho.

Sin konsiderashon pa kua ta despresiá o ta deskuidá pa atendé kosnan nesario. *Instabil* ku ta bandoná e propósitonan pa motibunan sin importansia.

Imprudensia por hiba nos na

aseptá un sirkunstansia ku ta alehá nos di Dios. O pa buska Dios den un medio ku no ta kondusí na djE.

Negligensia ku ta suponé e falta di interes pa aktua efikasmente den loke mester hasi. E ta diferente di e instabilidat pasobra den dje no tin ni sikiera e interes pa aktua. Ora ta referí na algu pertinente na salbashon, piká di negligensia ta grave. No tur negligensia ta piká kontra prudensia.

E don di Spiritu santu ku ta korespondé na e birtut aki ta e *don di konseho*.

Emperador Constantino

Figura di e promé emperador kristian

Constantino a nase na aña 280. El a sigui su tata komo Cesar di e partinan oksidental di e imperio i na 311 el a yega na ta emperador apsoluto for di 325 te ku 22 di mei 337. Ku rason nan a yam’é e promé emperador kristian; pero e no a yega na poseé nunca, kisas den e último añanan di su bida, un fe profundo i koherente. Eusebio de Nicomedía, obispu di palasio, ta batisá Constantino aña 337 pa djis despues Constantino fayesé.



E diktado di Galerio

E promé akta formal ku ta duna kristianismo sierto grado di libertat. Su kontenido:

- E ta manifestá ku e medidanan anterior únikamente a buska e bon mas grandi di e Estado i tabata ke purba restourá e leinan bieu i kustumbenan romano, na kua tabata ke restringí e kristiannan tambe.
- Esakinan a apartá nan mes di e religion di nan mayornan dunando nan mes leinan propio. Pero e diktado di persekushon no tabata por a dolegá e kristiannan; hopi di nan a pèrdè nan bida i otronan a kai den konfushon.
- A manda e kristiannan roga nan Dios pa e bon di e emperador, di estado i di nan mes.
- E diktadonan persekutorio a generá anarkia religioso. E emperadornan ta duna pordon na e kristiannan i ta pèrmítí nan reuní i praktiká nan fe basta nan no aktua kontra e órden públiko.

Su konsekuensianan:

- Restablesimentu di asambleanan, pues libertat di kulto.
- A liberá e kristiannan di e inseguridat hurídiko di e tempunan di pasado.
- Pa promé bia un diktado imperial a rekonosé kristianismo.

Den práktika esaki a resultá den entre otro:

- Kristiannan prezu a ser liberá.
- Esnan kondená a keda apsolbé.
- A bolbe praktiká religion kristian.
- E tèmpeknan kristian a bolbe yena.
- E kultonan a ser mas frekuentá.
- Hopi di esnan ku a sali di e pais a bolbe bèk i a rekonsiliá ku iglesia, na tabata pidi yudansa di esnan ku a mantené nan mes firme; nan a pidi pa nan bolbe ser atmití na komunion. Hasta tabatin paganonan ku tabata tuma parti den e alegria di e kristiannan i tabata felisitá nan pa e kambio.
- E diktado aki, ku a pone fin na e último persekushon, no tabata un manifesto pro-kristian sino un karta di libertat di kulto pa tur hende.
- Ta insistí ku ta menshoná ku e emperadornan ta ordená e kuestion religioso den e sentido di toleransia. Tur kristian tin libertat di kulto.
- Den dje e emperadornan ta mira un garantia di e boluntat divino pa futuro.
- Ta presentá un serie di disposishon partikular na favor di iglesia kristian.
- Tur edifisio kaminda e kristiannan tabata reuní lo ser duná bèk na nan sin gastu.

Karakterístikanan general di e periodo

- Tin un kambio di aktitut romano frente kristianismo, yegando na pasa den tempu di religion “pèrmítí” pa religion “ofisial” di e imperio.
- Ta establesé relashonnan nobo entre iglesia i estado.
- Ta haña e favor di e emperador, pa kua iglesia ta yega na poseé derechonan públiko i privá, biennan material, polítikamente proteh’é, apropiá pa apoyá i poderá su akshon religioso-moral i spiritual-kultural.
- Iglesia ta uni ku e forsanan kultural, ophetivo i personal di e imperio.

Ta desaroyá e bida interno di iglesia

- Organisashon di e atministrashon eklesiástiko (p.e. Konsilio di Nicea).
- Fiha fundamentu di e doktrina katóliko stimulá dor di e kontinuo distansiashon di sierto gruponan for di e doktrina (Heregia i Kiebro).
- Desaroyo di liturgia i e akshon pastoral i misionero.
- Desaroyo i konsolidashon di e bida monástiko, ku ta tuma diferente forma, no semper ekilibrá.

'Aan tafel' ku tema: 'Ròl di tabú i bèrgwensa dentro di kultura'

KRALENDIJK – 'Aan tafel', ya bo ta tende. E ta un gritu pa yama hende huntu pa momentu ku tin pa kome.

Kome konosementu i bistanan nobo, ta hasi asina na Boneiru.

Awe djabièrnè 23 di sèptèmber na Te Amo Beach di 6'or di atardi i 8'or di anochi, e grupo ta bolbe bini huntu na mesa ku komo tema 'Ròl di tabú i bèrgwensa dentro di kultura'.

Desde yanüari 2020 e grupo ta organisá seshonnan di diállogo pa profeshonalnan motivá di tur edat.

Durante e seshonnan aki ta papia tokante proyekto, òf tema kaminda ta haña konosementu, kompartí i na un sistema konstruktivo, drenta den kombersashon ku otro.

Kada luna ta invitá un eksperto, ku riba un tereno spesífiko ku por kontribuí. Banda di esei, ta siña komuniká riba tantu nivel lokal komo internashonal.

Dentro di konfigurashon seif di e mesa di diállogo, ta papia tokante temanan difisil ku e impakto komunitario, kibra tabú i ta keda retá pa pensa pafó i paden di kaha.

Esaki ta smak na mas, pa e huésped ku ke bira ekselente den su trabou òf proyekto.

Huésped spesial

Nathaly Cabrera ta huésped spesial na mesa, un profeshonal motivá sertifiká den rekursu humano, trener i coach ku un estado di servisio di mas ku 25 aña di eksperensia progresivo den rekursu humano i maneho. Su pashon ta pa yuda individuonan den organisashonnan pa alkansá nan potensial.

Cabrera su karakter propio reflehá, sintimentu pro-

fundo enorme pa humor, ta papia asuntunan serio riba un manera habrí kuné.

Hasi e preguntanan korekto i pensa huntu su part-

ner di kombersashon, ta su forsa. Tene e diállogo ku temanan pikante tokante asuntunan ku ta keda tabú, sigur tambe ta destiná pe.







Rijksdienst Caribisch Nederland
RCN-Unit Sociale Zaken en Werkgelegenheid

AWW penshun di viuda

Bo tabata sa ku viudo òf viuda ku na momento ku nan kasá a fayesé tabata biba na Hulanda Karibense tin derechi riba pago di AWW te ora ku nan mes yega edat di AOV?

E unidat SZW di RCN ta paga e kontribushon aki pa asina yuda kubri gastunan di kosto di bida.

Pa haña AWW, bo mester hasi un petishon. Pa sa mas di esaki, tira un bista riba www.rijksdienstcn.com.

èxtra
...number 1

www.extraboneiru.com



OPENBAAR LICHAAM
BONAIRE



Vacature

Wees het verschil wat je wilt zien.
Solliciteer nu!

Integriteitscoördinator (2x)

Meer informatie?



www.bonairegov.com/bestuur-organisatie/vacatures

Interupshon sistema informashon di botika


KRALENDIJK -- Fundashon Mariadal ta konfrontando interupshon den e sistema di informashon di e botikanan. Pa e motibu aki por lo pronto e botikanan ta obligá pa adaptá nan forma di traha.

Si un kliente ke kompletá su remedinan króniko, e ora ei ta pidi e kliente pa chèk promé si tin sufisiente na kas. Asina e kliente por evitá molèster debí na e interupshon. Den kaso ku esaki no ta asina, e ora ei dentro di 24 ora tin e remedinan kla. Na bali lo hasi e kliente algun pregunta tokante su uso di remedi i eventual uso di otro produktonan. Esaki ta nesesario pa siguridat di kliente. Por tuma resèpt i yama e kliente ora e remedinan ta kla. Por sosodé ku ta te djaluna ta yama e kliente tokante esaki.

Huntu ku e kliente lo sinkronisá kiko ta al-kansabel. Tur e puntonan menshoná por kondusí na tempu di espera mas largu. Fundashon Mariadal ta pidi kompreshon pa esaki.

Asina ku remediá e interupshon, ta anunsiá esaki.

Yuda nos tene nos playanan limpi



www.extraboneiru.com

Yuda nos tene nos Boneiru limpi



www.extraboneiru.com

 **KOOYMAN**


**TOOL
FEST**
**FOR YOUR
ENTIRE PROJECT**

7-9 OCTOBER

ARE YOU READY?

Spectacular discounts, amazing combo deals and a chance to win great prizes! Kooyman Tool Fest 2022 has more than just tools. Try and buy your favorite tools from the world's most well-known tool brands.

WWW.KOOYMANTOOLFEST.COM

Makita

DIAMONDBACK
WORK WEAR

WORX

 **KOOYMAN
PAINT**

Milwaukee

Duro Max
NEXT GENERATION POWER SYSTEMS

DEWALT

TOLEDO

fun miles

kooymanbv.com



THERE IS ALWAYS SOMETHING TO DO

**Pa info i komunikado den Extra/BONERIANO,
USA MAIL:
extrabon@gmail.com**

Muchanan por forma parti di obra teatral

‘E palu di kuenta ta konta di Kompa Nanzi’

KRALENDIJK -- ACE Kids Club ta bai kuminsá ku un proyekto nobo titulá ‘Palu di kuenta ta konta di Kompa Nanzi’.

Pa e proyekto nobo akí, ta buskando mucha entre 6 pa 11 aña, ku tin talento ku tin gana di forma parti di e siguiente obra teatral.

Aña pasá ACE Kids Club a traha riba ‘E palu di kuenta’, un obra ku tabata konta di personahenan

di kuantanan di fantasia manera Roodkapje, Hans & Grietje i Sneeuwitje.

A presentá e palu di kuenta vários biá pa públiko general.

E aña akí ke konsentrá riba e famoso personahe kultural ku henter pueblo di Boneiru konosé, kual ta Kompa Nanzi.

Den e obra lo bai haña diferente personahe manera Shi Maria, Shon Arei,

Cha Tiger, Pegasaya i hopi mas.

E obra lo tin komo base aktuashon, baile, músika i obra di man.

E parti di aktuashon i direkshon ta bou di guia di Lilimar Valencia, Joënnny Molina i Amalie Melaan, ta enkargá ku koreografia, Aimee Janga enkargá ku kanto i Joanne Nicolaas ku e parti di obra di man.

Treinen ta kuminsá na

òktober i ta estrená e obra desèmber.

Mayornan ku ta interesá pa nan yu forma parti di e obra teatral ‘Palu di kuenta ta konta di Kompa Nanzi’, por inskribí nan yu mesora.

Lugá ta limitá, pues no tarda na lastu momentu pa tuma un desishon.

Pa mas informashon por tuma kontakto na acesbonaire@gmail.com

Por manda un mensahe

via di +599-785-9832, òf via di página di Facebook ACE Bonaire.

Un danki na SKAL, Maduro & Curiels Bank, Fundashon Wega di Number Boneiru, WEB, Playa Trading, Gartish, Wilca N.V i Top Professional Cleaning, pa nan aporte na Art Culture Education Foundation, pa asina nos por sigui krea mas proyekto edukativo na mucha.



KOOYMAN

NO 09 - VALID FROM SEPTEMBER 22nd UNTIL OCTOBER 9th, 2022

COSY & TRENDY

15% DISCOUNT

NOS FOLDER NOBO A SALI!

OPTENIBEL ONLINE I DEN STORE

15% DISCOUNT

46.74 or 3337 Fun Miles 90804111

47.99 or 3436 Fun Miles 90805040

THERE IS ALWAYS SOMETHING TO DO

[kooymanbv.com](https://www.kooymanbv.com)

[Facebook](https://www.facebook.com/kooymanbv.com) [Instagram](https://www.instagram.com/kooymanbv.com)

THERE IS ALWAYS SOMETHING TO DO

BròKèS 93.5 FM

Tono Positivo, Ritmo Dibertido

STUDIO Telefon & WhatsApp

+599 701 0935

Maneho General;
Djòni Leoneta +599 786 9091

Maneho atministrativo;
Ethel Leoneta +599 796 9133
email; 93.5boneiru@gmail.com

Skueh'e

[Radio BròKèS 93.5 Boneiru](https://www.facebook.com/RadioBròKèS93.5Boneiru)

Tur loke ta payroll i HR den bo plant'i man!

www.payrollprohrm.com

[GET IT ON Google Play](https://play.google.com/store/apps/details?id=com.payrollpro) [Download on the App Store](https://apps.apple.com/nl/app/payroll-pro/id1441111111) **Payroll Pro**

NKBB i Bonaire Human Rights na Nashonnan Uní

KRALENDIJK-- Presidente di Nos ke Boneiru bèk (NKBB), James Finies i Davika Bissessar di Bonaire Human Rights, ta na New York pa e apertura di e di 77 asamblea general di Nashonnan Uní, den representashon di e pueblo komo sosiedat sivil, pasobra pueblo Boneriano no tin representashon.

Esaki ta un ekselente oportunidat pa informá

mundu tokante Estado Hulandes su kontinuo violashon di nos derechonan humano sagrado di outodeterminashon, kual di ningun manera por desvia for di nan.

Djaweps a marka di 218 dia riba e pelgrimage luchando pa hustisia sosial, polítiko, konstitushonal, kultural i ekonómiko, den e status kolonial ku e pueblo Boneriano den referèndem

di 2015 ku 65.6% voto nò, rechasando e status konstitushonal ilegal imponé riba e pueblo di Bonaire na 10-10-10.

E delegashon a sali for di Boneiru 16 di febrüari i awor mas ku shete luna kontinuo, ta riba e misjon pa konsientisá i buska apoyo i solidaridat pa e kaso di Boneiru.

E delegashon a partisipá na vários konferensia internashonal global i a reuní ku lidernan, gobièrnan i institushonnan den Amérika Latino. Niun di nan no tabata sa òf a tende di Boneiru promé. Awor lidernan i gobièrnan di México, Honduras, Belize, Panama, Costa Rica, Salvador, Colombia, Venezuela, Perú, Ecuador, Bolivia, Paraguay, Uruguay, Brasil, Argentina i Chile, tur sa i ta den solidaridat ku e pueblo di Boneiru.

Prinsipio di yùli e delegashon a bai e di 43 konferensia di CARICOM di hefenan di estado na Surinam, kaminda a presentá e kaso di Boneiru i e rapòrt



di investigashon di propio gobernashon na promé ministernan i presidentenan di paisnan di CARICOM i na e sekretario general di Nashonnan Uní, Antonio Guterres.

Seguidamente a kontinuá e pelgrimage den ost Karibe i a partisipá na konferensia global riba reparashon na Barbados, a reuní ku lidernan i gobièrnan. Despues a sigui pa San Vincente i Grenadines i Grenada. Na kuminsamentu di sèptèmber a sigui direkshon di Washington DC i awor ta New York trahando

ku mishonnan di e paisnan akí na Nashonnan Uní tokante ponementu di Boneiru riba lista di teritorionan sin propio gobernashon. E delegashon su speranza ta haltu ku e sakrifisyonan i esfuersonan di lòbi di último lunanan pa e trayektorio i ophetivo pa e kaso di Boneiru pa pon'é bèk riba lista di teritorio-nan sin propio gobernashon di Nashonnan Uní tin posibilidad grandi di keda presentá den e periodo benidero di e 77 asamblea general di Nashonnan Uní ku a kuminsá e siman akí.

Di Kuerpo Polisial Karibe Hulandes

Konsehero di komunikashon i bosero nobo

KRALENDIJK-- Djárasen Miluska Hansen a despedí di e funshon komo konsehero di komunikashon i bosero di Kuerpo Polisial Hulanda Karibense, KPCN. Na mes momentu a introdusí Genesis Saragoza, e persona ku ta bai okupá e funshon. Caroll-Ann Soliano ta kontinuá huntu ku su kolega nobo.

Na e okashon akí, hefe di KPCN, Jose Regales, a dirigí palabra. “Miluska, un kolega sigur hopi kerí serka nos. El a hasi hopi e 5 aña ku el a okupá e funshon. El a guia e kolega nobo, Genesis Saragoza, bon, pues por ta sigui ku e parti di komunikashon entre prensa i polis ta habrí pa informá na e momentu

korekto.”

Hansen na su turno a bisa, masha danki pa e tempu ku a pasa. Kisas tabatin biá kosnan tabata bai poko steif, pero bon nos a pasa sigur. Prensa semper ta primi i nos tin ku ta bon na altura promé informá prensa, loke semper el a hasi durante su trabou.

Genesis Saragoza: “Mi ta kontentu pa e oportunidat ku mi a haña pa e funshon komo konsehero di komunikashon i bosero di KPCN. Mi ta prosedente di Boneiru i a biba riba e isla i 5 aña pasá mi a bai studia komunikashon internashonal na Hanze Hogeschool na Groningen, Hulanda. Momentu mi a kaba studia, mi a traha algu mas ku 2 aña na Fundashon Si-

mavi na Amsterdam, den e departamentu di komunikashon.”

Aimed Ayubi di Live99.9 FM, a papia na e okashon i a bisa ku e ta

kontentu pasobra e sa ku e ta unu ku ta yama molestia Miluska hopi. Despues ku RCN a atendé un temporada ku e funshon akí, Miluska a drenta i kos a

bira mihó pa loke ta trata informashon. Awor Genesis ta drenta i e ta guiá pa Miluska, asina nada no bai robes. Nos mester di polis i nan mester di nos.



Panel solar riba dak di Van den Tweel

KRALENDIJK -- Den e solo kayente di sèptèmber ta difisil pa no duna e kalentamentu di mundu falta di e molèster di tantu kalor. Pero si sa ku Van den Tweel, un di e supermerkadonan mas grandi na Boneiru, tin awor mas ku 710 panel di solo riba su dak, e lo produsí un sonrisa riba bo kara.

E instalashon fotovoltaiko nobo, PV, ta usa e lus di solo briante pa generá sufisiente elektrisidat pa su uso durante di dia. E sistema tin un kapasidat di 284.000 watt i lo no pèrkurá solamente pa un uso di energia mas efisiente di Van den Tweel, pero e lo yuda tambe pa redusí e ‘carbon footprint’ na Boneiru drástiko, segun Bharat Bhojwani di Participatiemaatschappij Caribisch Nederland B.V. (PMCN). PMCN ta e vehíkulo pa invertí kapital di Pensioenfonds Caribisch Nederland (PCN) pa tur su invershonnannan lokal riba e islanan BES.

E transakshon di PMCN

a bira posibel den forma di un kombenio solar lease ku e grupo di Van den Tweel. E invershon aki ta kuadra perfektamente den e metanan ambiental, sosial i bon gobernashon, di tantu PMCN komo esnan di Van den Tweel Caribbean.

PMCN ta konta ku esaki ta e promé di mas instalashon PV ku e ta hasi posibel riba islanan BES. Na Van den Tweel a demostrá ku por i ku e ta funshoná.

E distribuidó di instalashon PV, IFA Solar Energy, ku ta establese na Kòrsou, tabata un konekshon krusial den e totalidat.

Henoc Luis di IFA Solar Energy no ta un desconosí den e sektor empresarial Boneriano i a instalá sistemanan semehante kaba pa mas empresa na Boneiru. Pa e proyekto por a usa e mihó panelnan solar i konvertidó ku tin riba merkado. Elektrisistanan lokal di Boneiru a yuda profesionalmente pa prepará e supermerkadu pa e energia di e panelnan, Luis a bisa.



Direktor Ike Johnson i Chief Operating Officer, Omar Barrientos, di Van den Tweel Caribbean Group ta hopi kontentu ku e invershon aki. “Na komienso di nos kòmbersashonnan pa posishoná e instalashon PV, e preis na

Boneiru tabata masomenos \$0,23 pa kwh. Awor e ta mas ku \$0,40 pa kwh, komo konsekuensia di e redukshon di supsidio for di Hulanda i e preisnan haltu pa kombustibel.

E invershon aki ta bini pues na e momentu per-

fekto pa e supermerkadu grandi aki na Boneiru.”

E siguiente ku ta na turno pa Van den Tweel Caribbean na Boneiru, ta Bonaire Warehouse. Segun espektativanan, lo kuminsá ku instalashon na e sitio den luna di òktober.

BONEIRU MESTER DI BO!


Fundashon Históriko Kultural Boneriano



ta buskando boluntario pa yuda salvagardiá nos patrimonio kultural-históriko tangibel i intangibel.

Trabou ku tin pa hasi:

- Selektá i archivá dokumento
- Digitalisá foto, audio i imágen
- Ordená i registrá artefakto
- Identifiká persona, suseso, sitio etc. riba foto
- Hasi entrevista pa Herensia i programanan kultural
- I hopi mas trabou.....



Tin trabou ku por hasi na kas tambe. Tuma kontakto ku FuHiKuBo na e-mail fuhikubo@gmail.com òf app (por yama tambe) na telefòn 795-0020.



REUNION KONSEHO INSULAR

Presidente ta partisipá ku tin un reunion públiko di Konseho Insular (formashon di opinion), riba djamars **27 sèptèmber 2022, pa 17.00'or** den sala di reunion di Konseho Insular na Passangrahan. Ta trata di e reunion di 13 di sèptèmber 2022 ku a posponé.

Agènda:

8. Terser kambio di presupuesto di Entidad Públiko Boneiru 2022.
- 9.. Tratamentu di e promé ehekushon di reportahe 2022 di Entidad Públiko Boneiru;
10. Klousura.

Na tratamentu di e puntonan di agènda 8 i 9 ta invitá Kolegio Ehekutivo.

E konvokashon aki lo keda publiká elektrónikamente riba e parti públiko di e sistema di informashon di Konseho Insular (RIS) i te asina leu ku ta aplikabel, e dokumentunan konserní manera kustumber ta na Grefi na disposishon.

Lo transmití e reunionnan di Konseho Insular “live” atraves di e dos kanalnan di televishon Nos Tv i Dutch Caribbean TV. Tambe por sigui e reunion riba nos página di facebook i Youtube.

E.E. Rijna
Presidente



Na 2035 henter Boneiru kompleto ta kore outo eléktriko

KRALENDIJK— Gabinete hulandes ke pa henter Boneiru drai kompleto riba energia duradero. E partido lokal, MPB, ke pa na 2035 e isla kompleto ta kore outo eléktriko. No realístiko, diferente habitante ta haña. Minister Rob Jetten di klima i energia, na inisio di e aña akí a primintí Tweede Kamer pa bini ku un plan kon Gabinete ta bai hasi e islanan duradero.

Esaki mester sosodé rònt di verano. Na Den Haag, partido di koalishon CDA a bisa ku e munisipionan partikular.

Boneiru, St. Eustatius i Saba, pa mas tardá na 2035, mester drai kompletamente riba energia bèrdè.

Parlamentario di CDA, Henri Botenbal, ke pa minister Jetten stipulá un fecha. Gewon stipulá un meta kla, miéntras pa loke ta trata e partidonan di koalishon, D66, CDA i partido di oposishon Groenlinks, e islanan karibense te asta por bira un modelo

pa restu di mundu. Marit Severijnse ta skirbi riba e site di Caribisch Netwerk: “Boneiru ta bai kompleto riba outo eléktriko? Sí ta keda na partido MPB, tur hende riba e isla ta kore eléktriko na 2035.”

“Kore duradero pa mi ta un di e kosnan di mas grandi pa realisá,” Elvis Tjin Asjoe, lider polítiko di MPB, ta bisa. E ta haña ku tantu polítika hulandes komo lokal, awor mester tuma pasonan fuerte kon esaki mester ta presis. Pa esaki mester pensa riba benefisio.

Un hende ku a kaba di kumpra un outo ku ta kore riba gasolin, no ta bai deshasí di e outo sin mas. Na Hapon hendenan ku ta kore outo eléktriko por ehèmpel ta paga ménos impuesto. Impuesto di importashon pa outo eléktriko tambe mester keda sierto periodo abou, MPB ta haña.

Sosten

Riba kaya hendenan

ta reakshoná krítiko riba e idea. Nan ta duna poko konfiansa ku esaki ta bai realisá promé ku 2035.

Tòg e plan por konta riba sosten for di oposishon, sí elaborá esaki mas aleu. Miembro di Konseho Insular di Frakshon Coffie, Daisy Coffie, ta pensa ku e plan ta alkansabel. E ta posibel, solamente henter e infrastruktura di Boneiru mester ta kla pe. E ta pensa esaki ta e promé kos ku mester hasi. Den eksterior kaminda mester kore distansia largu, hopi biá ta tende ku hendenan preferibel no ke outo eléktriko. Netamente riba un isla por kore un outo asina henter dia fásilmente i anochi karga bateria.

“Paso pa paso hendenan ta bai kore sin zonido na Boneiru,” Tjin Asjoe ta mira. “Ketu bai tin mas i mas baiskel i skuter eléktriko. Aki un aña lo tin hopi mas.”

Pagabel?

Partido Demokrat ta



mira kore eléktriko posibel, pero ta krítiko. Lider polítiko di e partido, Clark Abraham, ke evitá ku aworó e ta bira un benefisio prinsipalmente pa habitantenan riku. Pasobra hopi hende ya for di awor no por paga pa un outo i outonan eléktriko ta mas karu. Kon bo ta bai kompensá e hendenan akí, e ta puntra su mes.

Segun Abraham, ta bon pa hasi e sektor turístiko duradero, pero aki tambe riba un base di òrdu. Imaginá, nos ta kuminsá ku e sektor turístiko. Mester bai stimulá taksistanan tambe pa buska un outo asina i ta bai duna nan deskuento riba kompra. E ora ei mester bai sòru tambe pa tin suficiente kaminda pa karga bateria. Nos mester pensa

bon tambe kiko ta bai hasi ku e baterianan despues.

Elektrisidat generá dor di zeta Un otro problema ta e durabilidad riba e isla mes.

Na Boneiru ainda ta generá energia dor di generatordan disel. Na 2014 e produkshon di energia bèrdè na Boneiru a subi ku 42 porshento, mas haltu ku nunka, danki na turbinanan di biento.

Dor di e demanda kresiente, e kantidat di habitante kresiente i turista, e porsentahe akí a baha drástikamente te na 29 porshento na 2021, segun Abraham.

Caribisch Netwerk a aserká lider polítiko di UPB, James Kroon, na diferente okashon pa un reakshon. E no a aseptá e invitashon.

KÒRSOU

Basta aktividat kriminal

WILLEMSTAD -- Den e periodo di 12 pa 18 sèptèmber 2022, polis a registrá i a analisá e siguiente aktividatnan kriminal.

A registrá 7 atrako.

Nan tabata entre 19.00'or pa 23.00'or i 02.00'or pa 03.00'or na Blanquillaweg, Kent U Zelf, Gosieweg, Kaya Nimfa, Kaya Cumulus, Pater Eeuwensweg.

Ladronisia di vehíkulo tabatin 7 entre 06.00'or i 21.40'or. Sitio na unda a bai ku outo tabata Winston Churchillweg, Ilandsweg, Kaminda Hensley Meulens, Wr. W.P.Maalgweg i

Kaya Douwe Zalm. E outonan embolbí tabata Hyundai H100, Kia Soul, Kia Rio, Kia Picanto (2x).

Tabatin 5 kiebro den kas entre 07.00'or pa 11.00'or i 15.00'or pa 20.00'or na Schottegatweg Oost, Kaminda Jose Papa Liberia, Kolonelsweg, Motilonesweg, Titanstraat. Mayoria biá dor di kibra porta i bentana.

Tabatin 11 kiebro den negoshi entre 01.00'or i 08.00'or. Sitio: Schottegatweg Oost, Emancipatie Boulevard, De Savaan, Uruguayweg, Roodeweg, Winston Churchillweg, Mercuriusstraat (2x), Fred-

erickstraat, Souax, Jan Noorduynweg. A kibra porta den mayoria kaso.

Kiebro den/na outo tabatin 13 entre 00.00'or pa 06.00'or i 15.00'or pa 20.00'or. Sitionan tabata Waaigat Plein, Kaya Wana, Timorweg, Plaza Mundo Merced, Baya Beach, Kaya Mamondengue, Pater Eeuwens, Weg, Kaya Phaëton, Bethencourt Straat, Kaya Abeha, Venezuelaweg, Kaya Yerba Bueno, Prinses Magriet Laan.

Violensia relashonal tabatin 9. Nan tabata na Sta. Rosa, Sta. Maria, Souax West, Brievengat, Rio Canario, Oost Jongbloed, Groot Sta. Martha.

A kontrolá 133 vehíkulo

WILLEMSTAD -- Djárason 21 di sèptèmber 2022, personal di warda di polis di Otrobanda, Punda, UST i Departamento di Tráfiko a tene un kontrol di tráfiko.

E kontrol aki tabata dirigí entre otro riba pasamentu den lus korá na krusada Van Eyk van

Voorthuyzenweg/ Pater Euwensweg i Helmin Magno Wiels Boulevard/ Pater Euwensweg.

Un total di 133 vehíkulo a keda kontrolá i a parti 114 prosès verbal di kual 25 ta pa pasamentu den lus korá i tambe pa otro infrakshonnan den tráfiko. Manehá un vehíkulo sin:

Faha di seguridat bistí; Reibeweis bálido; Seguro bálido; Karchi di kùr bálido; Plachi number, i tambe manehá un vehíkulo ku winshil skur.

7 vehíkulo a wòrdu transportá ku kran bou di kondishon.

E kontrolnan aki ta kontinuá.

Minister di Cultura ta elabora riba trabaonan di e prome aña di gobernacion:

A dedica na e celebracionnan cultural importante di nos Pais

ORANJESTAD -- Pa locual ta e prome aña di Gabinete Wever-Croes II, Minister Xiomara Maduro ta splica den lineanan grandi e trabaonan realiza bao di e maneho di 'Cultura bo tin cu bib'e.' Cultura tin un papel clave den e formacion di e hende, e desaroyo duradero di nos Pais y ta instrumental pa Aruba su economia, bida social, medio ambiente y bienestar general. Pa e diversificacion di Aruba su economia, cultura tin un rol esencial den e sector prometedor di e Industria Creativo.

Den e prome aña di gobernacion, Gobierno a dedica na e celebracionnan cultural importante di nos pais, caminda a reconoce

nos baluartenan cultural y a traha pa expone nos herencia cultural.

Pa conmemora e 35 aniversario di Status Aparte di Aruba, Gobierno a organisa e Conferencia '35 Aña Status Aparte, Aruba ta di nos tur.' Un conferencia den cual por a aprecia e historia di e comienso, e lucha, e desaroyo y e miras pa futuro di Aruba como Pais autonomo den Reino Hulandes. E mensahe principal di e conferencia tabata, 'Aruba ta di nos tur y Aruba mester di nos tur pa por surpasa e retonan nos dilanti.'

Pa nos hobennan por siña y biba nos cultura, a introduci un programa educativo na television pa muchanan di scol prepara-

torio y basico yama Kibra Coco.

Esaki ta un quiz cu ta pone atencion na nos dianan di celebracion nacional manera, Dia di Betico, Dia di Himno y Bandera y San Juan - Dera Gay.

Hunto cu esaki a traha riba tres video informativo 'Historia di Nos Gran Libertador Betico Croes', 'Conoce Nos Himno, Nos Bandera y Nos Escudo' y 'Dia di San Juan - Dera Gay | Nos Tradicion'.

Pa reactiva Aruba su nos economia y como parti di e 'Exit Strategy Covid 19,' Gobierno a organisa un Parada Nacional di Luz. Cu esaki a 'Cend'e Mecha' pa e preparacion oficial di locual ta trata e exposicion cultural di mas grandi di Pais Aruba cu ta Carnaval. E gozo, alegria, union y creatividad den e colornan di e Bandera di Pais Aruba a resalta den e Parada Nacional di Luz.

Gobierno a reconoce varios Baluarte Cultural, entre nan, sr. Janiro Eisdén pa su 30 aña cu ela dedica na farandula di Aruba, sr. Etty Toppenberg den fe-



liz memoria pa deleita y yuda nos tene nos herencia cultura bibo pa mas di 65 aña, Massive Brassband bou direccion di sr. Reinwald Roderich Lopez pa promove nos musica di Asambeho den e parke mas bishita na mundo Disney Magic Kingdom y sr. Jossy Brokke, e voz di oro, pa su 60 aña den farandula.

Pa por fomenta arte bou di nos hobennan, a sigui cu competencia di Arte di Palabra, Poeta di Patria, Dream-Dare-Do, Gang di Arte y tambe gobierno a instala un comision pa presenta un plan pa educacion cultural na scol.

Pa conserva y expone nos herencia cultural, Gobierno a organisa un cam-

paña 3C-TRECE cu e meta pa Colecta-Conoce-Conserva documento, potret y informacion digital cu ta importante pa keda archiva y exponi na conocimiento di nos comunidad.

Di e manera aki ta conscientisa nos comunidad di e balor pa conserva material historico cu ta forma parti di e memoria colectivo di nos Pais.

Gobierno a produci tambe programanan educativo y informativo na television. Asina nos por a mira e programa 'Cera Conoci cu RCC Aruba', cu ta un grupo di acrobacia cu ta representa Aruba riba tarima internacional. Alabes a produci un programa tocante 'Conscientisacion di e Dia di Dera Gay' y tambe 'Historia di Esclavitud na Aruba' pa asina nos como comunidad por acepta nos pasado di esclavitud for di un perspectiva di libertad.

Minister Maduro ta finalisa recordando cu Cultura tin un papel clave den desaroyo duradero di un Pais.

Cultura ta instrumental pa economia, bida social, bienestar general y medio ambiente di un Pais. Como mandatario lo sigui traha duro riba e industria creativo, cu lo bay keda desaroya durante e transcurso di proximo añanan.



Presentacion di e artista Arubiano Gilbert Senchi

Arte y cultura tambe ta un forma pa atrae turismo pa Aruba

ORANJESTAD -- Na ocasion di bishita di Minister Maduro di Cultura na e atelier di e artista Arubiano Gilbert Senchi na Bogota, sra. Miriam Dabian directora di ATA pa Latino America tabata presente y a percura pa prensa na Colombia tambe wordo poni na altura di e trabou nan cu ta wordo haci pa integra mas arte publico na 'La isla

Feliz de Aruba.'

Turismo ta diversificando y e turista cu ta bishita Aruba mas y mas ta busca pa haya sa mas di e historia y e cultura di nos Pais.

Pa e motibo aki na ocasion di e bishita di Minister Maduro na e atelier di e artista Gilbert Senchi, a invita sra. Miriam Dabian pa asina ATA Latino America tambe por haya sa mas di e

trabounan cu ta wordo haci pa integra mas obra di arte publico na Aruba.

E obra 'Driekel' cu proximamente lo bay dorna un retonde den e area turistico di nos Pais, ta un obra di arte publico cu ta conscientisa nos y brinda honor na tur esfuerso cu ta wordo haci pa proteha e Driekel cu ta scohe Aruba pa bin traha su neishi y pone su

webonan. E Driekel tur aña ta biaha miles di miya pa bin Aruba y ta nos Pais su promer 'repeat visitor.'

Pa e motibo aki e obra di arte publico 'Driekel' ta brinda honor y gratitud tambe na tur turista cu ta bishita nos Pais tur aña.

Minister Maduro ta gradici sra. Miriam Dabian y staf di ATA Latino Amer-

ica hunto cu reportero di El Tiempo pa tabata presente na ocasion di e 'private viewing' di e obra Driekel.

Arte y Cultura tambe ta un forma pa atrae turismo pa Aruba y e mandatario ta contento di por a comparti informacion riba e plannan pa integra mas arte publico na encanto di turismo na Aruba.



Minister di Finansa ta elabora riba trabaonan di e prome aña di gobernacion:

Gobierno a sa di cumpli cu tur su debernan financiero

ORANJESTAD -- Den lineanan grandi Minister Xiomara Maduro ta splica riba e trabaonan cu a wordo realiza den e prome aña di gobernacion Gabinete Wever-Croes II. COVID19 a afecta nos finansa publico grandemente y den e prome aña di gobernacion nos a dedica pa reduci e deficit cu e pandemia aki a trece cune pa Aruba. E deficit di 1028 miyon florin ta wordo reduci grandemente den apenas 3 aña di tempo. Tur esfuerso ta dirigi pa Aruba por conoce atrobe un surplus.

Den e prome aña di gobernacion, Gobierno a sa di cumpli cu tur su debernan financiero y a traha pa

mantene e credibilidad financiero di nos pais. Aruba a mantene su rating di inversion cerca Standard & Poor's y Fitch cu a cambia Aruba su rating di negativo pa stabiel, cu ta un noticia positivo pa Aruba por atrae inversionistanan.

Un otro logro pa Pais Aruba ta e evaluacion positivo cu Aruba a ricibi di Caribbean Financial Action Task Force (CFATF). Aruba y Bermuda tabata e unico dos paisnan den region di Caribe cu un score positivo den e lucha contra labamento di placa y financiamiento di terrorismo. Esaki ta un señal fuerte na inversionistanan cu Aruba su sistema financiero ta uno

integro. Gobierno a sigui traha na un forma constructivo pa sigui cumpli cu e condicionnan di Hulanda pa por ricibi sosten di likides y tambe pa por cumpli cu e Landspakket acorda entre Hulanda y Aruba.

Pa nos Pais por ta mas fuerte y resiliente den cuadro di e ehecucion di e Landspakket a introduci un garantia di deposito pa sigura estabilidad di nos sistema financiero y proteccion di e consumidor. A haci investigacion riba, entre otro, maneho y otorgacion di subsidio y ta bay fortifica e funcionamiento di e departamentonan crucial pa maneho financiero di Pais Aruba.

Riba tereno fiscal gobierno a prepara cambianan pa yega na un sistema fiscal mas simpel y husto pa Aruba. Na comienso di aña a organisa session di 'stakeholders' pa asina haya informacion, ricibi comentario y sugerencia di varios gremio. A prepara pa e introduccion di un sistema di BTW, pero debi na e inflacion mundial creciente, a pospone esaki y na su lugar ta prepara un 'Plan di Impuesto 2023' cu ta keda presenta fin di september proximo.

Riba e tereno presupuestario, Gobierno a traha pa cumpli na presenta presupuesto 2023 na ora, conforme locual nos Constitucion ta prescribi. Esaki

despues di 15 aña cu Gobierno no a logra entrega presupuesto na ora na Parlamento di Aruba.

Den e prome aña di gobernacion a traha na un manera responsabel pa reduci gasto di gobernacion door di contene gasto di personal y baha gasto di servicio y producto.

Tambe a percura pa hiba un maneho di no crea debe innecesario, pa asina baha e presion riba nos finansa publico.

Minister Maduro ta enfatisa, cu den e temponan dificil aki, Pueblo por tin e tranquilidad cu trabou serio ta wordo haci pa Aruba por conoce estabilidad financiero na bienestar di un y tur.

Durante reunion di Nacionnan Uni na New York

Prome Minister a informa di trabounan den cuadro di igualdad di genero den educacion

ORANJESTAD - Prome Minister Evelyn Wever-Croes a participa na un panel cu entre otro Malala Yousafzai riba e topico: "Call to action to advance gender equality and girls and women's empowerment in and through education", den cual a trata e tema tambe "leaving no one behind". Prome Minister a trece dilanti tur locual cu Aruba ta haciendo riba e tereno di igualdad di genero y inclusividad.

Manera cu a anuncia anteriormente, e siman aki Prome Minister ta na New York pa atende Asamblea General di Nacionnan Uni. Den cuadro di esaki tin diferente encuentro di interes pa cada pais pa cual Prome Minister Wever-Croes ta informa di locual Aruba ta haciendo den cuadro di educacion durante di e "Transforming Education Summit 2022".

Primeramente Prome Minister a duna un splicacion breve di con Aruba a atende cu cu enseñansa du-

rante e pandemia Covid-19. Aruba a mantene scolnan cera solamente pa tres luna y despues a habri esakinan bek. Motibo tras di esaki ta pasobra a realisa cu hende muhe, personanan di edad y muchanan, tabata esunnan desproporcionalmente mas afecta door di e pandemia.

Pa locual ta igualdad di genero den educacion na Aruba, Prome Minister a comparti algun data. Na Aruba e cifra di mucha muhe y mucha homber cu por lesa y scirbi ta casi igual. Mas o menos 97% di e grupo di persona 15 aña bay ariba ta considera 'literate' y no tin mucho diferencia entre muhe of homber den esaki.

Mientras cu Aruba ta haci enfuerso pa elimina e espacio cu tin entre diferente genero den educacion, a tuma nota cu tin mas hende muhe ta registra na scol secundario y universidad. Hende muhe tin dos biaha mas chens pa sigui educacion avansa. E por-

centahe di hende muhe cu a sigui studia despues di educacion secundario tabata 21% na 2016, compara cu hende homber cu ta 11%.

Sinembargo ta tuma nota si cu tin diferencia ora cu mira estudionan STEM, caminda cu ta solamente un fraccion di hende muhe ta participa na e tipo di estudio aki.

Como un iniciativa pa adresa esaki, Aruba a lansa e "STEM the GAP Project" a traves di e Supernova, pa por crea mas interes/ encurasha mas mucha muhe pa sigui educacion den rumbo di STEM.

Prome Minister Wever-Croes a sigui bisa cu e situacion aki no ta asina na Aruba so. Globalmente mas hende muhe ta sigui educacion avansa compara cu hende homber. Pues e 'perdida di interes aki' aki, ta un preocupacion rond mundo. Den cuadro di esaki ta importante pa mira kico e posibel origen di esaki ta. Normanan y expectativa- nan di cierto genero, tambe



ta impacta mucha homber, nan motivacion y deseo pa studia na diferente forma, Prome Minister a remarca.

Na Aruba, e plan nacional di educacion ta basa riba e meta di desaroyo sostenibel number 4 (SDG 4), cual ta alinea cu e principionan di igualdad. Banda di esaki recientemente a finalisa e prome "Nacional Gender Policy" cu e obhetivo pa adresa desigualdad di genero y pa percura pa acceso na educacion di calidad pa un y tur.

Den cuadro di esaki e ta importante pa enfoca pa mucha hombernan no wordo exclui ora cu ta bin cu esfuersonan di igualdad di genero y mescos ta conta pa mucha muhe. Contrario

na esaki, educacion cu ta basa riba igualdad ta beneficia mucha muhe, mucha homber y sociedad.

Terminando Prome Minister a bisa: "Si percura pa mihor educacion y un sociedad mas husto, mas un pais lo prospera. Na Aruba nos ta comprometi na esaki y ta spera di por siña for di ottronan y traha hunto pa logra cambianan necesario. Esaki ta algo cu como lider nos ta debe na futuro generacionnan. Manera cu a menciona, mucha muhenan ta den e grupo di esnan cu a wordo mas afecta durante Covid-19, y si no tene cuenta cu esaki awo durante recuperacion, ta riesgo perde tur locual cu hende muhe a lucha pe y a logra."

Dos persona a keda deteni

Team di aresto cu entrada hudicial na Paradera

ORANJESTAD -- Ministerio Publico compaña pa autoridad a haci un entrada judicial na un aparta-



mento situa na Paradera.

E prome detencion tawata di un hende homber haci door di Team di Aresto y despues cu e aresto a tuma lugar, e otro teamnan a yega despues compaña pa personal di Ministerio Publico.

Despues di a rista e apartamento y confisca varios articulo di interes a laga trece e transportwagen, cu a bay cu locual parece ta pareha di e persona deteni door di team di aresto.

E dama cu no ta local a wordo hiba Warda di Recherche na Wayaca, por a mira cu e no tawata den boei.

DEPORTE

Klínika pa trener i coach di sòftbòl i beisbòl

KRALENDIJK -- Den kuadro di e plan di desaroyu di deporte pa Boneiru di Entidat Públiko Boneiru i VBS, algun profeshonal di Koninklijke Nederlandse Baseball en Softball Bond últimamente tabata di

bishita na Boneiru pa yuda den struktura i desaroyu di deporte na Boneiru.

Despues di esaki mesora a kuminsá ku algun kurso i klínika pa trener i coach di sòftbòl i beisbòl, pa asina por implementá esaki nan i

duna guia hóbenan.

Na luna di yùni partisipantenan por a sigui un klínika pa trainer i coach, TC1, kaminda nan a risibí nan sertifikado i djáron anochi tabatin praktiká dor di Ben Thijsen di Curaçao Baseball Development Foundation i durante di e siman akí nan lo sigui den praktiká pa haña nan sertifikado pa TC2 di trainer i coach di sòftbòl i beisbòl.

Djáron anochi na Jossy Boekhoudt Ballpark tambe tabatin treinen i introdukshon na coach i trainer pa e deporte Baseball 5 Instructors (BB5), bou di instruktur Michel Aussems kaminda 6 di coach i trainer di INDEBON tambe a partisipá na e klínika ku meta pa por introdusí, praktiká i entrená e deporte na otro coach, skol i aktividatnan deportivo na Boneiru.

Na final di e práktika

tur partisipante a risibí nan sertifikado.

Organisadónan di grupo di kontakto i grupo di trabou di sòftbòl i beisbòl, por mira tras riba un plan eksitoso i e interes grandi di parti di e partisipante pa

por sigui e plan di desaroyu i entrenamentu.

Chynessa Cornelia a partisipá tambe pa keda pendiente ku próksimamente ta bai informá mas di tur e kursonan trein i klínika nan ku ta bai tin.



DEPORTE

Bonaire Stars den torneo sòftbòl Dutch Caribbean Master 60+ na Aruba

KRALENDIJK--E ekipa di sòftbòl veterano 60+ maskulino di nos isla ku ta e ekipo Bonaire Stars, ta den torneo Dutch Caribbean Masters 60 Plus aya na pais ruman Aruba.

Esaki ta di 30 di sèptèm-

ber pa 3 di òktober 2022.

Na e torneo lo partisipá ekiponan di:

Sint Maarten.

Boneiru.

Kòrsou.

Aruba.

Apèrtura di e torneo

E apèrtura ofisial lo inisiá ku himnonan di e paisnan i islanan partisipante.

Despues lo sigui palabranan di Bon Bini di organisadónan di e “Dutch Caribbean Master Plus

Aruba”.

Despues di hasi entrega ofisial di e diferente plakatnan di rekonosementu, lo tin promé lansamentu i “playball” pa duna inisio ofisial na e torneo.

E delegashon di Bonaire

Stars ta konsistí di 22 persona ku ta biaha djabièrnè 30 sèptèmber mainta ku Buelo EZair i regresá kas djaluna 3 òktober ku e promé buelo.

Programa

Apertura ofisial ta 30 sèptèmber 2022 pa mitar di ocho anochi na Flatstone Ballpark.

Apèrtura ofisial di e torneo lo inisiá ku himno di Sint Maarten, Boneiru, Kòrsou i Aruba.

Informashonnan adishonal ku nos tin ta mustra ku Bonaire Stars pa e torneo aki a prepará su mes super bon pa duna bon bataya i bunita representashon di nos isla den e torneo aki.

Fo’i djawó nos ke deseá Bonaire Stars tur pero klase di éksito ku tantu e preparashonnan pa e torneo, pero tambe den representashon di nos isla den e torneo fin di e luna aki aya na pais ruman Aruba.. Éksito.

Real Rincon vs Vitesse awe nochi

KRALENDIJK--Plei-òf kampionato 2022 di futbòl di nos isla ta sigui awe djabièrnè den su fase final di Buèlta Seis, ora ku pa 8or anochi den Stadion Antonio Trenidad na Rincon, e kampionnan di sv Real Rincon di Rincon enfrentá e velos ekipo di SV Vitesse di Antriòl Pabou.

E partido aki ta e último tambe di e ekiponan aki pa e plei-òf Buèlta Seis.

Ta trata di un partido ku tur hende ta spera pa mira e dos ekiponan aki enfrentá otro den e plei-òf.

Un Real Rincon ku ta desidido pa bai ku e viktoria, meskos tambe e ekipo di SV Vitesse.

E partido aki pues ta pri-

mintí di bira otro tremendo partido di e kampionato, ku dos ekipo buskando nan último viktoria di e plei-òf.

E partido aki sigur lo bira un tremendo partido ku lo hala tambe bastante fanátiko hiba Stadion Antonio Trenidad na Rincon pa mira e partido.

E partido aki lo hala bastante hende hiba Stadion Anto-

nio Trenidad, ya ku hopi hende ke mira e partido aki, un partido ku dos ekipo buskando nan último viktoria di e plei-òf.

Sigur un tremendo partido ku abo fanátiko di e ekiponan aki i di e deporte Rei Futbòl, no por pèrdè awe nochi.

Éksito na e ekiponan den e partido.

BoVoBo representá na di 38 kongreso FIVB na Hulanda

KRALENDIJK--Di akuerdo ku informashonnan ku nos a risibí di e bont di vòlibòl di nos isla, BoVoBo ku ta e bont di vòlibòl boneriano, e siman aki a representá Boneiru den e di 38 kongreso di FIVB ku ta e federashon internashonal di vòlibòl, esaki na Hulanda. Boneiru na e kongreso tabata representá pa e presidente di BoVoBo sra. Gisette Emer, tambe e miembro pa desaroyo di “Beach Volleyball” di Norseca, direktor di kampionato pa BoVoBo i miembro pa desaroyo di vòlibòl pa Norse-

ca, sr. Jose-Luis Nicolaas.

Na e kongreso tabata presente tur e paisnan ku ta afiliá na e federashon internashonal FIVB.

Ta trahando huntu ku diferente instansia i federashonnan pa sigurá i stabilisá e desaroyo i kontinuidat di vòlibòl na Boneiru.

Ta preparando tambe e regreso di John Kessel na luna di novèmber pa sigui ku entrenamentunan pa vòlibòlista i entrenadónan.

Desaroyo di vòlibòl ta den man di kada individuo i ekipo.

BoVoBo ta fasilidat ku

método, material i kaminanan pa por krese.

BoVoBo (Boneiru) ta wòrdu rekonosé mundialmente pa su motivashon, dedikashon i pèrseveransia pa e desaroyo di vòlibòl na Boneiru. Nos futuro ta den nos man.

Esaki di akuerdo ku informashonnan suministrá e siman aki pa BoVoBo, e bont di vòlibòl di nos isla, bou di presidensia di sra. Gisette Emer.

Riba potrèt e dos representantenan di Boneiru na e di 38 kongreso di FIVB na Hulanda.



Boto nobo di Duana

KRALENDIJK -- Djaweps 22 di sèptèmber e boto nobo di Duana a yega Boneiru.

Ta trata di un Eduardono 380, di mas o ménos 12 meter di largura, ku 3

motor 300 PK, ku un velosidat máksimo di 45 mia pa ora.

Ku e boto aki, por alkansá e kosta kompletu di Boneiru i por ta presente na tur lokalidat di mane-

ra rápido. Relashoná ku remplaso di e boto bieu di Duana i e kolaborashon den e tim Multidisiplinario Marítimo Hub Boneiru, den kua tin vários partner di kadena manera Duana,

KMar, Wardakosta, KPCN i OLB ta traha huntu, a inisiá e destaho pa un boto nobo na 2021.

Durante e destaho tambe tabatin kolaborashon estrecho entre e partnernan

di kadena.

Ku e boto nobo akí Duana i MMHB ta mas mihó prepará pa ehersé tareanan den kuadro di vigilansia di frontera i seguridat di habitantenan di Boneiru.



UNI-K



2.0T
TURBOCHARGED
ENGINE



390Nm
MAX TORQUE



AUTO
8-SPEED
TRANSMISSION



FOUR
WHEEL-DRIVE



12.3" TOUCHSCREEN
W/ VOICE CONTROL



21-INCH
SPORT WHEELS



360-DEGREE
CAMERA



HIDDEN
DOOR HANDLE

\$36,995
introductory price



CHANGAN AUTO

dabboussi
motors

UP TO **5**
Year Warranty

f /dabboussimotors

786.6662